

Na osnovu člana 52. Statuta Sindikata BH Telecoma, Centralni odbor SBHT, na sjednici održanoj 19.06.2014. godine donio je :

PRAVILNIK O RADU SUDA ČASTI SINDIKATA BH TELECOM

OSNOVNE ODREDBE

Član 1.

Sud časti SBHT (u daljem tekstu SČ SBHT) je visoko moralno i arbitražno tijelo Sindikata BH Telecoma, utemeljeno radi zaštite programskih opredjeljenja, politike i svrhe utemeljenja SBHT, statutarnih utemeljenja i djelovanja članova i tijela SBHT u skladu sa "Etičkim kodeksom" sindikalnog ponašanja u okviru SBHT, osnovnim načelima o ljudskim pravima i slobodama, te poštivanju slobode osobnosti i radničke solidarnosti.

Član 2.

SČ SBHT je tijelo SBHT koje prosuđuje u slučajevima:

- djelovanja protivno odredbama Statuta i politike SBHT
- djelovanja koje predstavlja povredu načela, temeljnih vrijednosti i odredaba „Etičkog kodeksa“ sindikalnog ponašanja
- kada je to određeno aktima ili odlukama tijela SBHT

Član 3.

Zadaci SČ SBHT su da časno i objektivnom prosudbom u najvišem interesu za SBHT i njegovo članstvo:

- doprinese poštivanju Statuta i politike SBHT, njegove časne prepoznatljivosti i dosljednosti,
- doprinese jačanju unutrašnje kohezije članstva,
- doprinese demokratičnosti, sindikalnoj solidarnosti i unapređenju saradničkih odnosa članstva i tijela SBHT,
- doprinese nastojanju da osnovne vrijednosti „Etičkog kodeksa“ sindikalnog ponašanja u članstvu i tijelima SBHT postanu prepoznatljiva snaga na BiH sindikalnoj sceni,
- da jača dostojanstvo i vrijednosti svakog člana SBHT

Član 4.

Pravilnikom o radu SČ SBHT, utvrđuje se:

- osnovne odredbe
- konstituiranje tijela
- pripremanje i sazivanje sjednice
- tok i način rada na sjednici
- odlučivanje
- vođenje zapisnika i evidencija odluka
- rad pomoćnih tijela
- prijelazne i završne odredbe

Član 5.

SČ SBHT obavlja poslove iz svog djelokruga shodno Statutu SBHT i „Etičkom kodeksu“ sindikalnog ponašanja, na način utvrđen Pravilnikom o radu Suda časti.

KONSTITUIRANJE TIJELA

Član 6.

SČ SBHT radi na sjednicama i sastoji se od 9 (devet) članova iz svih OSO.
Radi u vijeću od najmanje pet (5) članova uključujući i Predsjednika SČ SBHT.
Sastav Vijeća za svaki slučaj određuje Predsjednik SČ SBHT.
Prvu sjednicu SČ SBHT nakon izbora novih članova (konstituirajuću sjednicu), najkasnije 30 dana od dana izbora saziva Predsjednik SBHT
SČ SBHT iz svojih redova bira Predsjednika SČ SBHT.
Za predsjednika izabran je kandidat koji je dobio većinu glasova ostalih članova SČ SBHT.
Predsjednik SČ SBHT saziva i rukovodi sjednicama SČ SBHT.
SČ SBHT se sastaje po potrebi.
Sjednice SČ SBHT održavaju se u pravilu u sjedištu SBHT.
SČ SBHT donosi Poslovnik o radu Suda po kojem radi na sjednicama.

PRIPREMANJE I SAZIVANJE SJEDNICE

Član 7.

Zahtjev za postupanjem SČ SBHT dostavlja se na adresu Sekretara SBHT, sa naznakom: „za Sud časti“.
Sekretar SBHT zaprima predmete i dokumentaciju upućenu SČ SBHT,
Administrativno priprema uslove za sjednicu Suda časti, te u roku od 8 dana obavještava predsjednika SČ SBHT o svakom prispjelom predmetu, a predsjednik SČ SBHT dužan je sazvati SČ SBHT u što kraćem roku a najduže 30 dana od dana dostave predmeta.

TOK I NAČIN VOĐENJA SJEDNICE

Član 8.

SČ SBHT zaprima, analizira i prosuđuje dostavljene predmete, te donosi odluke i prosudbe u skladu sa Statutom i „Etičkim kodeksom“ sindikalnog ponašanja.
Postupak od strane SČ SBHT odvija se po utvrđenom redu:

- analiza zahtjeva iz priložene dokumentacije
- po potrebi obavljanje razgovora o predmetu sa strankama obuhvaćenim predmetom spora
- donošenje odluke ili prosudbe rješenja spora u roku od 48 sati nakon završene rasprave.

Član 9.

Radi objektivne prosudbe, a u cilju pravednog rješenja spora, SČ SBHT može pozvati, kako člana Sindikata koji se obratio SČ SBHT, tako i sve druge koji na bilo koji način doprinose pravednom rješenju spora, članove Sindikata, predstavnike tijela sindikata, sindikalnog povjerenika, kao i svaku drugu osobu za koju smatra da će biti od koristi u rješavanju predmeta spora.
Predsjednik SČ SBHT može odstraniti prisutne osobe koje ometaju tok rasprave i čije ponašanje nije u skladu sa „Etičkim kodeksom“ sindikalnog ponašanja.

ODLUČIVANJE NA SJEDNICI

Član 10.

SČ SBHT može donositi validne odluke i prosudbe ako je na sjednici prisutna većina članova SČ SBHT. Odluke i prosudbe donose se konsenzusom.

Član 11.

Osobe koje su pozvane na sjednicu na kojoj se raspravlja o predmetu spora ne smiju biti prisutne kod odlučivanja.

Član 12.

Svaki član i tijela Sindikata dužni su uvažavati odluke Centralnog odbora SBHT, a po prosudbi SČ SBHT.

ZAPISNIK O RADU SUDA ČASTI SBHT

Član 13.

O radu SČ SBHT vodi se zapisnik.

Zapisnik na sjednici SČ SBHT sadržava:

- spisak prisutnih
- dnevni red
- dokumentaciju po predmetu spora
- izjave stranaka u sporu i svih drugih pozvanih osoba
- tekst donešenih odluka i prosudbi

Zapisnik se verificira potpisom svih članova SČ SBHT koji su prisustvovali sjednici na kojoj se raspravljalo o predmetu spora.

PRIJELAZNE I ZAVRŠNE ODREDBE

Član 14.

Predsjednik SČ SBHT obavještava zainteresirane strane o odluci i prosudbi SČ SBHT pismenim putem. Predsjednik SČ SBHT obavještava Centralni odbor SBHT pismeno i prisustvom na sjednici Centralnog odbora, o provedenom postupku i donesenom odlukom, odnosno prosudbom SČ SBHT.

Član 15.

Predsjednik SČ SBHT je obavezan podnijeti izvještaj Centralnom odboru SBHT u pismenom obliku o radu SČ SBHT u jednogodišnjem razdoblju, kao i ukupni četverogodišnji izvještaj na kraju mandata članova SČ SBHT.

Član 16.

Pravilnik o radu Suda Časti SBHT SBHT stupa na snagu danom donošenja od Centralnog odbora SBHT.